



---

Služba za saobraćaj, stambeno-komunalne poslove i građenje

## OPĆINSKO VIJEĆE ILIJAŠ

**Odgovori na vijećnička pitanja i inicijative sa 34. sjednice Općinskog vijeća Ilijaš  
održane dana 30.09.2019.godine**

Ilijaš: Oktobar 2019.godine

**MIRZA BEKTIĆ – vijećnik SDA**

Inicijativa 1: "Pokrećem inicijativu prema nadležnoj Službi, za uređenje ograde na mostu u Kadarićima na rijeci Bosni i postavljanje adekvatne barijere kako ne bi bio ugrožen život građana. Obrazloženje: U više navrata obratila mi se grupa građana iz Kadarića, čija djeca prelaze preko navedenog mosta zahtijevajući postavljanje zaštitne ograde na mostu s obzirom da postojeća ograda ne zadovoljava minimume sigurnosti. U prethodnom periodu podnosio sam inicijativu sa istom tematikom, ali do dan danas nisam dobio nikakav odgovor od nadležne službe šta se planira uraditi i da li je neko izlazio na teren da utvrdi činjenično stanje na navedenom mostu".

Odgovor: Postojeći most na rijeci Bosni u Kadarićima je izgrađen sa svim potrebnim elementima koji objekti ovog tipa moraju imati. Na ogradi mosta nisu vidljiva oštećenja. Regulacionim planom je predviđena izgradnja novog mosta na rijeci Bosni koji bi zadovoljio potrebe stanovnika naselja Kadarići u narednom planskom periodu.

**MUHAMED HANDŽIĆ – samostalni vijećnik**

Pitanje 1: "Zašto na regionalnom putu Ilijaš-Bioča-Ahatovići (R-951) nije postavljena nikakva saobraćajna signalizacija koja bi učesnicima u saobraćaju olakšala kretanje istom dionicom? Obrazloženje: Vozači koji se kreću iz pravca Ilijaša prema Sarajevu često lutaju po Bioči neznajući koji ih put vodi za Sarajevo, te se tako vraćaju na polaznu tačku ili pitaju građane kako da dođu do odredišta. Ovim načinom, mi kao lokalna zajednica, pokazujemo svu svoju ozbiljnost prema onima koji se prvi put ovdje nađu".

Odgovor: Inicijativa je dostavljena Direkcija za puteve Kantona Sarajevo i do slanja materijala za OV-e nismo dobili odgovor, po dobijanju istog bit će dostavljeno.

Pitanje 2: "Kada će se riješiti problem odlaganja smeća na Banovcu, tačnije u ul.126.Ilijaške brigade ispred broja 100. i 102.? Obrazloženje: Na navedenoj lokaciji instalirano je pet kontejnera od kojih su tri za kategorisani otpad, dok su preostala dva planirana za nekategorisani otpad. Obzirom da se uz tu ulicu nalazi veliki broj zanatskih i ugostiteljskih objekata, te da se sa drugih lokacija svakodnevno dovozi smeće i odlaže u ta dva kontejnera, postoji opravdana potreba za većim brojem kontejnera ili otvaranje nove lokacije za odlaganje smeća u neposrednoj blizini već postojeće".

Odgovor: Preduzeće KJKP "Rad" d.o.o.Sarajevo svakodnevno vrši odvoz smeća i postojeći broj kontejnera je dovoljan za potrebe građana. Problem prave pravni subjekti koji ne posjeduju vlastite kontejnera, a dužni su ih imati. KJKP"Rad", je pokrenuo aktivnost preko Službe eko redara da se naloži pravnim subjektima da izvrše nabavku vlastitih kontejnera i reguliše odvoz otpada.

**MIRSAD OSMANOVIĆ – vijećnik SDP-a**

Inicijativa: "Pokrećem inicijativu da izvođači radova koji su ranije, prilikom izvođenja radova na području općine Ilijaš napravili štetu privatnom ili javnom dobru, a istu nisu sanirali, ne mogu dobiti poslove dok to ne učine – saniraju napravljenu štetu.

Ako se ništa ne uradi po pitanju ove inicijative, sljedeću put ću predložiti da je usvojimo u formi zaključka".

Pitanje: "Kada će se namiriti šteta građaninu Spahić Idrizu (MZ Dragoradi) koja je nanesena prilikom izvođenja radova na putu za selo Vladajevići od strane firme "Halilović"? Na dosadašnje zahtjeve Spahić Idriza, općinski organ se ogлуšio. Kako ne bi došli u situaciju da naš građanin pokrene sudski spor, tražim da se što hitnije reaguje na navedeni zahtjev. Uz pitanje prilažem:

- ranije zahtjeve
- kopiju katastarskog plana i
- fotokopiju lične karte.

Odgovor: Kada se budu izvodili radovi na rekonstrukciji puteva na području MZ Dragoradi bit će dat nalog izvođaču radova da izvrši uklanjanje ostataka materijala i predmetno zemljište vrati u prvobitno stanje.

**ŠEHERZADA ĆOSIĆ – vijećnica SDA**

Inicijativa: "Pokrećem inicijativu prema Službi za saobraćaj, stambeno-komunalne poslove i građnje i Službi za društvene djelatnosti i poslove mjesnih zajednica za popravak i

nasipanje lokalnog puta. Obrazloženje: U naselju Salkanov Han, odvajanje prema Halugama na dijelu trase lokalnog puta prema građanima Bešić Šerifu i Mahmutović Amelu došlo je do oštećenja na lokalnom putu usljed oborinskih voda i bujica tako da je usporeno funkcionisanje kretanja građana i saobraćaja u pokretu. Pojedine parcele uz ovaj lokalni put otkupljene su od strane nepoznatog vlasnika i isti angažuje mehanizaciju za uređenje navedenog zemljišta, te direktno i indirektno utiče na trenutno stanje navedenog puta. U naselju Mrakovo, na trasi lokalnog puta od prodavnice "Amko" prema Gornjem Mrakovu, tj. romskim kućama i prema cvjećari "Nesimović" došlo je do pucanja i izbočina na lokalnom putu usljed nekontrolisanog prevoza teškog tereta, a isti nije obilježen adekvatnom signalizacijom, te je otežano kretanje građana i saobraćaja u pokretu. Napominjem da su navedeni putevi nedavno asfaltirani. U naselju Gornje Mrakovo na dijelu trase lokalnog puta prema Čaturama i dalje prema Huskićima došlo je do izbočina na lokalnom putu usljed nekontrolisanog prevoza tereta na istom i normalno funkcionisanje kretanja građana i saobraćaja u pokretu je skoro nemoguće. Molim vas da odmah intervenišete putem inspektora, izvođača radova i nadzora i da se oštećenja što prije otklone, jer postoji opasnost za kretanje građana i mogućnost većih oštećenja na motornim vozilima i samoj trasi puta.

Odgovor: Urbanističko-građevinski inspektor je izvršio uvid na terenu i utvrdio da su navodi tačni i poduzet će mjere i aktivnosti iz svoje nadležnosti. Služba za saobraćaj, stambeno-komunalne poslove i građenje, prioritarno vrši radove koji su predviđeni Operativnim planom za 2019. godinu, te trenutno nije u mogućnosti angažovanje na pomenutim dionicama. Navedeni zahtjevi biti će uvršteni u program redovnog održavanja za narednu godinu.

Inicijativa: "Pokrećem inicijativu prema Službi za saobraćaj, stambeno-komunalne poslove i građenje za saniranje kanalizacije Apartmansko naselje Popovići. Obrazloženje: Od strane građana MZ Mrakovo obavještena sam da u dijelu potoka Kraljevac u Halugama izlaze otpadne vode Apartmanskog naselja Popovići. Postoji informacija da otpadne vode iz navedenog naselja nisu uopšte spojene u izgrađeni kolektor fekalne kanalizacije koji je izgrađen zajedničkim ulaganjem vlasnika naselja i Općine Ilijaš. Molim vas da provjerite istinitost navoda iz akta i poduzmete Zakonom propisane mjere".

Odgovor: Komunalni inspektor općine Ilijaš, je izvršio inspekcijski nadzor nad izgradnjom infrastrukturnog objekta kanalizacionog voda u naselju Popovići, na parceli br. 1512 i br. 1513 k.o. Podgora I, te utvrdio da je općina Ilijaš kao investitor dobila urbanističku saglasnost Broj: 05/1-23-333/17 od 24.07.2017. godine za izgradnju sanitarno fekalne kanalizacione mreže za apartmansko naselje Popovići, čija planirana trasa prelazi preko zemljišnih parcela označenih kao: k.č.br. 1512 K.O. Podgora I novi premjer i k.č.br. 1513 K.O. Podgora I novi premjer. U skladu sa članom 38. Zakona o komunalnim djelatnostima ("Sl. novine Kantona Sarajevo" br. 14/16, 43/16, 10/17 i 19/17), vlasnik građevine dužan je priključiti svoju građevinu na komunalnu infrastrukturu pod uslovima utvrđenim propisima koji regulišu oblast prostornog uređenja i građenja, kao i drugim propisima, te svoju građevinu priključiti u skladu sa članom 43. i 44. Uredbe o opštim uslovima za snabdijevanje vodom za piće, obradu i odvođenje otpadnih i atmosferskih voda ("Sl. novine Kantona Sarajevo" br. 22/16). Prema članu 43. ove Uredbe odvođenje otpadnih voda u urbanim područjima u kojima nije izgrađen kanalizacioni sistem prema krajnjoj namjeni korištenja prostora kao i u neurbanim područjima gdje nema kanalizacionog sistema, a omogućeno je snabdijevanje vodom putem vodovodnog sistema, odvođenje otpadnih voda se vrši u vodonepropusnu septičku jamu (sabirnu) kao posebnom izgrađenom objektu unutrašnje kanalizacije. Član 44. navedene uredbe definiše način i izgled septičke i sabirne jame. Izvođenje priključka u skladu sa članom 49. stav (1) iste uredbe "Priključenje unutrašnje kanalizacije na javni kanalizacioni sistem vrši davalac usluga". Što je u ovom slučaju uradilo JKP "Vodostan" d.o.o Ilijaš. Međutim u okolnostima kada se mora izvršiti priključak posrednim putem (preko zemljišta drugog vlasnika) tehničko rješenje i izvođenje posebnog priključka vrši davalac usluge, kojem je dostavljena saglasnost vlasnika tog zemljišta, koju pribavlja korisnik usluge, što u ovom slučaju nije učinjeno. Provjerom u općinskoj službi za imovinsko pravne poslove, geodetske poslove i katastar je utvrđeno da je otvoren predmet za pribavljanje saglasnosti vlasnika zemljišta na navedenoj trasi.

Napomena: U prilogu je odgovor na vijećničku inicijativu, koji je pristigao iz JP "Elektroprivreda BiH" - Podružnica "Elektrodistribucija" Sarajevo.

Služba za saobraćaj,  
stambeno-komunalne poslove i građenje



Javno preduzeće  
**ELEKTROPRIVREDA BOSNE I HERCEGOVINE**  
d.d. - Sarajevo

Podružnica "Elektrodistribucija", Sarajevo

OPĆINA ILIJAŠ

Služba za saobraćaj, stambeno-komunalne  
poslove i građenje  
ul. 126. ilijaške brigade br. 6  
71 380 Ilijaš

17.09.2019  
Sarajevo, 25.09.2019. godine  
Broj: 03-4-222-52592/2019

01. 10. 2019

Predmet: Odgovor na vijećničku inicijativu povodom loših naponskih prilika u naselju Doci i Vratuša, kao i zaseoku Nanići (MZ Kamenica)

Poštovani,

Na osnovu Vašeg dopisa br. 03/1-23-sl/19 od 09.09.2019. godine, a vezano za poboljšanje naponskih prilika u naselju Doci i Vratuša i zaseoku Nanići (MZ Kamenica), dostavljamo Vam sljedeću informaciju.

Dopisom broj: 03-4-222-14272/2019 od 13.03.2019. godine, obavijestili smo Vas da je za stabilizaciju naponskih prilika u naselju Doci i Vratuša, potrebno izgraditi novu transformatorsku stanicu TS PODLUGOVI 11, srednjenaponski priključak za ovu transformatorsku stanicu i niskonaponske kablovske odlaze za interpolaciju u postojeću niskonaponsku mrežu.

Također obavijestili smo Vas da će se završetkom izgradnje nove transformatorske stanice, te po dobivanju upotrebne dozvole za istu, izvršiti interpolacija nove transformatorske stanice u postojeću niskonaponsku mrežu. Na taj način doći će do smanjenja opterećenja postojeće niskonaponske mreže, što će znatno poboljšati naponske prilike ovog područja. Izgradnja pomenute transformatorske stanice je obuhvaćena trogodišnjim planom ulaganja, te je u toku provođenje ekonomske analize investicionog ulaganja, kao i iznalaženje potrebnih sredstava za izgradnju energetskih objekata.

U vezi stabilizacije naponskih prilika u zaseoku Nanići (MZ Kamenica), obavještavamo Vas da Podružnica „Elektrodistribucija“ Sarajevo planira rekonstrukciju niskonaponske mreže u zavisnosti od više parametara: stanje naponskih prilika, broj kvarova na mreži, priključenje većeg broja novih objekata na mrežu, te samog fizičkog stanja mreže. Uzimajući sve ove kriterije u obzir Podružnica „Elektrodistribucija“ Sarajevo planira investiciju u rekonstrukciju ove niskonaponske mreže, a realizacija na terenu najviše ovisi od raspoloživih sredstava ili eventualnih novih programa na bazi kreditnih sredstava.

U cilju stabilizacije naponskih prilika na ovom transformatorskom području Podružnica „Elektrodistribucija“ Sarajevo je pokrenula proces izrade tehničkog rješenja sa svim pratećim dozvolama i saglasnostima, kojim će se popraviti naponske prilike. Realizacija tehničkog rješenja se očekuje u narednom periodu.



Sa aspekta efikasnije realizacije zacrtanih planova lokalna Mjesna zajednica može dati svoj doprinos kroz pomoć kod rješavanja imovinsko-pravnih odnosa vezanih za lokaciju nove transformatorske stanice i priključnog srednjenaponskog voda.

Napominjemo da je stanovnicima i dalje na raspolaganju naš Informativni centar i besplatni telefon broj 080 02 01 33, odnosno mogućnost da prijave svaki problem na mreži. Naše interventne elektromonterske ekipe će učiniti sve da, do konačnog rješenja, otklone opasnost i koliko je moguće, ublaže nastale probleme.

S poštovanjem,

Co:

03-4-22

03-4-222

  
Direktor  
Haris Trnka